

ON MATRIMONIO PAR PROCURA

De Olga S. da presina (Albaredo d'Adige)

Fin ai ani zincoànta pòco pi, gh'èra tanti butèi de la Bassa che par ciapàrse on franco e farsù on avenire i nasèa laoràre in Svizzera a fare i muradòri, ma anca in Brasile, in Australia e altri posti de là de l'Oceano. A chel tempo a gh'èra ci se sposava par procura; matrimoni combinà tra famèje. Nel 1991, la Olga la m'ha contà...A casa mia, tra fradèi e sorèle a jerino in dòdase come i dòdase Apostoli "Eeh, si... 'na olta le nostre mame no le gavèa mai mal de testa" Mi, a jèro la pì vecia e gavèa 'pena imparà a fare la sarta, laoràvo calcossèta a casa mia, laòro no ghe n'avèa mia tanto parchè gh'èera tanta povertà. Coando a gò compio vintiun ano, me pòro 'pà 'l m'ha dito: "Olga, desso che te sì diventà majorène, saria ora che te te catèssi el moroso, che te te sistemèssi! Cnosso 'na famèja da Isola Rizza stimà da tuto el paese, sana, bona jènte e tanto de cesa, la gh'è saria on butèlo che faria pròprio par ti, domenica vao a tasto còssa i pensa luri. In te 'stà famèja gh'èra coatro sorele e tri fradèi, in tuto sete, in pi i du genitori e i du veciòti. Me nono Pace, cossì el se ciamàva, sentù 'sti discorsi, el giorno drio descondòn de tuti, l'è partio e l'è nà a Isola in trazza (a chiedere informazioni) de 'sta famèja " allora se usava cossita", de 'sta famèja tuti gha dito de ben e coando l'è vegnù a casa el gha parlà co me opà e el gha dito "Rino, ghe son 'pena na mi a informarme de che la famèja, gh'è tuto aposto, 'desso vaghe ti a combinare". A la domenica dopo le Funzion religiose, me opà liè partio e l'è nà da che la famèja a parlare de mi, e se i gha on fiòlo da età giusta che gha intenzion de maridarse." Si"-el gha risposto el popà, "A ghe n'ò du in Australia e coèlo che gò a casa l'è oncora zòeno". " Mi a gò 'na fiòla pronta da moroso, brava da mestieri de casa e anca la fa la sarta, sarissi (sarebbe) contento se i se conosèsse e i se sposèsse?" Che l'altro el gha risposto: Se vu me disi che l'è brava me fido, ghe (avete) 'na so fotografia?". Me opà el ghe l'avèa sol tacuin, " Ciò 'na bela fiola gavi, granda e anca grussiera pròprio par me fiolo, doman ghe la spedisso, de sicuro la ghe piase"- gha dito el bopà " E vu me ne dèò (date) mia una de vostro fiòlo che ghe la mostro a me fiola?- gha dito me opà. "Ecola là so la cornisa in zzima a la càrdenza, gò solo coèla ma ve la dao volentieri zà che diventaremo parenti". Coando me opà a l'è vegnù casa el m'ha dito: Olga, te savarè che t'ò catà 'l moroso, el staria a Isola ma l'è a laorare in Australia a fare el muradòre, ecco la fotografia, te piàselo?. Lu muradòre e ti sarta, sèto coanti schei ciapè?. I so genitori jè contenti che ve fè morosi, gò lassà la to fotografia e domàn i ghe la manda co la nostra direzion (indirizzo). A dir la verità a l'èra on bel butèlo, fatostà, che dopo on mese 'riva la prima lètra e sicome che a casa mia a jèrino tuti analfabeta, me opà in mia presenza el l'ha fata lèzare da on maestro. La letra la disèa che son bela, che ghe piase e ghe saria la dona che fa par lù. Mi ghe rispondo tramite el maestro, che anca a mè el me piasea..l'è massa distante. El me risponde che no 'l vòle mia pèrdarme, che anca i so genitori a jè contenti e che nol vòle mia 'spetare tanto a maridarme e tante parole d'amore che me gha fato pròprio innamorare. Che bele letre che 'l me mandava, le tegno oncora tute ligà col nastro rosso e ogni tanto me le lezo, parchè col tempo gò imparà lèzare, jè parfin giale e coasi rote a forza de lèzarle. Dopo coalche mese el me manda 'na letra che 'l dise che nol

vòle pi 'spetare, e che par 'desso e no 'l pòle vegnèr in Italia, che'l gà paura de perdarme e che podèmo maridàrse par procura. Me opà el gà acetà subito prima de mè, e cossì anca i so genitori e i gà combinà la data del matrimonio ch' in Italia e ci gavarìa fato el passo al posto de me moroso. Me moroso, stessastessa data e co 'n'antra dona là in Australia. Sèmo maridà senza éssarse mai visti, solo in fotografia e in pì on matrimonio combinà tra le do fameje. Me gò maridà co ' me vestito bianco, pranzo in casa e dopo...in leto da mimi sola. La procura l'è stà delegà da on cusin de me moroso. Me go maridà de inverno, on fredo supiava aria de neve e tuti i parenti ingruotolii i me spetava davanti la cesa. Le campane le sonava come so le feste e mi a rivo a piè co i me familiari on pòco in ritardo e tanto emozionà e go caminà fin al banco in do' gh'èra el cusin de me moroso al posto del me sposo proprio come on vero spozalizio. Dopo pocopì de on ano e vèrme mucia i schei par el viajo son partia par l'Australia co la cassa de la dota, pi de on mese de mare, no ghe 'rivàvo mai. La, mè 'spetava me marì coèlo vero con altra gente, ma prima de partìre gavèa scritto come m'avaria vestia e che gò le dreze pontà a giro testa in modo che el me conòssa e lù el m' 'spetà con cartelon scritto belo grando: "BRUNO ATTENDE LA SUA OLGA". Pena che l'ò visto liò conossù subito, l'avaria conossù anca senza el cartelon. Sèmo corsi inconta e sèmo sbrazzà streti streti, che emozion!. Me gavèa portà ia anca el vestito da sposa par farne le fotografie con me marì in modo de vèrghe on bon ricordo. El gavèa parecià la casa co i mobili novi e anca on gramòfono par 'scoltar le canzon, el volèa che no me manchèsse gnente e gnanca che laorèsse, ma mi gò scomizià subito laorare co 'na bona clientela. Me fsèa paura 'frontàre on mondo difarente, macetà subito ben. Ghèmo fato 'na vita da fola, ghèmo avù coatro fiò, do done e du òmini. Coando a sèmo tornà in Italia par festejàre co i parenti i zzincoant'ani de matrimonio, el di prima el Signore el me l' 'à portà ia. Son tornà là par vendare la me casa, invece me fiò i s' 'à fato la so fameèja e jè restà là. Coèsto l'è successo a mi nei primi ani coaranta. 'Na olta se fasèa cussita; l'omo che nasèa laoràre distante par no fare du viaj andata e ritorno par vegnèr tòrse na morosa in Italia par maridàrsela e si anca par risparmiar i schei del viajo.